

**MAK'ANIA LACMILHPAT
CHAI MAK'ANIA
LACCHIVINTI**



**MAK'ANIA LACMILHPAT CHAI
MAK'ANIA LACCHIVINTI**

Algunos Salmos y Proverbios

Tepehua de Huehuetla



La Liga Bíblica
Las Sagradas Escrituras para Todos

Las ilustraciones en las páginas 4, 6 y 17 son propiedad de ©1978 David C. Cook Publishing Co., usadas con el permiso correspondiente.

Primera edición
Algunos Salmos y Proverbios
Tepehua de Huehuetla
tee 05-097 1.5C

©La Liga Bíblica, A.C., 2005
México, D.F.

Prólogo

El Antiguo Testamento es un conjunto de libros que se presenta como una de las dos secciones de la Biblia. Estos libros cuentan cómo se relacionó Dios con la gente hace mucho tiempo. Fueron escritos por israelitas, y hablan mayormente de la relación entre Dios y la gente israelita. Se terminaron de escribir hace más de dos mil años. Algunos fueron escritos hace más de tres mil años y otros más tardes.

Este libro es una selección de poesías que se encuentran en los libros de Salmos y Proverbios del Antiguo Testamento, los cuales fueron escritos originalmente por los israelitas. Con el propósito de que este libro no fuera muy extenso y de difícil lectura, no se incluyeron todos los cantos que contiene el libro de Salmos ni todos los dichos que contiene el libro de Proverbios. Después de haber leído este libro, le recomendamos leer completamente los libros de Salmos y Proverbios del Antiguo Testamento, los cuales se encuentran a la mitad de la Biblia.

Mak'ania Lacmilhpat Chai

Mak'ania Lacchivinti

Ju lacaMak'ania Ats'oknut alhiqui, na tijlhu lac'alhiqui ju lact's'okcanta. Pus ju ani alhiqui ix'aclhtam ts'okcanta ju tuchi ts'okcanta ju lacaBiblia. Chai ju laca'ani lac'alhiqui ts'okcanta tas ix'alacput'achivinin ju Dios ju lapanacni ju na mak'anchich. Pus ju ani lac'alhiqui israelitanin ju talacts'okta. Pus ixlacatach tas ix'alact'alaich ju Dios ju israelitanin ju lhichivininta.

Chai ca tapasatach lakat'ui milh c'ata ju xats'ojk'ocean ju ani alhiqui. Para ju ali' lac'alhiqui palaich na mak'anch ju xats'okcan.

Ju alhiqui ch'ap'at'a laminmaca' lhichivinin lacats'unin ixlacata laclhakt'asajunti. Pus ju ani lhakt'asajunti ixtats'okni'an ju israelitanin ju ts'okcanta ju lacaMak'ania Ats'oknut.

Alin vachu' ju ali' lacchivinti. Chai vachu' alin ali' lacmilhpat. Para jantu ts'okcanta ju laca'ani alhiqui ni jantuch na va k'elhtank'ai cava. Pus ju chunch jantuch na va lhixcai ixlakts'inca u ixt'achivininca. Pus vachu' iclalhimap'aksiyau: Acsni alakts'ink'oya'it'it ju ani alhiqui, tasq'uini ni alakts'ink'otit ju ats'oknut alhiqui ju juncan lacchivinti chai ju lacmilhpat. Pus ju ani lac'alhiqui la'ixlacaitat lhitajucan ju lacaMak'ania Ats'oknut.

Sumario

1. Ju ali' lacmilhpat ju ixtapulak'ayai ju Dios ju israelitanin
(Maxtucanta ju lacaSalmos 1-150) 1
2. Ju ali' ix'atalaninichivinti'an ju israelitanin
Maxtucanta ju lacaProverbios 1-31). 21

Ju ani ats'oknut yuch ju ts'okcanta ju lacasast'i ixchivinti
Dios ju tuchi tapasata ju ts'okcanta ju lacamak'ania
ixchivinti Dios ju lacaSalmos chai ju lacaProverbios. . . 25

Ju ali' lacmilhpat ju ixtapulak'ayai ju Dios ju israelitanin

Maxtucanta ju lacaSalmos 1–150

*Ju israelitanin ixtapacxanta lakatam k'elhtank'ai alhiqui junta
ixtats'okta tam cientos at'up'uxancau milhpat. Pus ju anich
lacmilhpat yuchach ju ixtapulak'ayaich ju Dios. Chai vachuch ju
yuchi lacmilhpat Salmos ixlaclhimispacan.*

*Pus ju ani lacmilhpat na lhu lacts'oklh ju k'ai ucxtin ju
ixjuncan David. Para ju alich lacmilhpat tachi ju yuchach
ali'itnich israelitanin ju talacts'oklh.*

*Pus ju ucxtin David p'ulhnan lacts'oklh ju ixlacmilhpanich ju
Dios. Chai ju alich lacmilhpat na astanch ju talacts'oklh ju
ali'itnich israelitanin.*

*Pus acsnich ju talacts'oklh acsni ixtalajquitasp'itchokotach ju
israelitanin ju xalak'achak'an Babilonia. Pus ju Babilonia
laxa'aktsulh junita ju xalacat'un Caldea.*

*Chai ju anchi tachi ju va tach'inch ix'alacchi'ancanta ju
israelitanin. Pus acsni talaccha'anchokolhch ju xalacat'un Juda
na ixtalack'achanchokotach.*

*Pus ju alich lacmilhpat acsnich ju talacts'oklh tachi
ju va ipxuxtaknicanch lak'ailakts'iuch ju Dios. Chai ju
acsni lanach k'ox talacmilhpanilh ju Dios. Chai ju alich
talaclhits'oklich ni va ixtalhixtaknich lak'ailakts'iuch ju Dios ju
israelitanin.*

*Chai vatach ixtalacchipast'ac'ach chux ju lack'ai lhamak'an ju
ixnavitach ju Dios ju ixlacatach'an ju israelitanin. Pus chux ju ani
lhamak'an israelitaninch ju ix'alacnavinicanta.*

*Chai ju alich lac'ats'oknut milhpat va ixtalacpusq'uwinich
ix'aklhtaijunti ju Dios.*

Pus chinich ju lacnajunta ju laca'ali' Salmos.

Salmo 1

Ju Dios lhist'ac'a ju lapanac ju jantu navi chunch alactu'unti tachi ju alactu'unin. Chai na mapaini ni lana vatach pastact'ajunch ju tuchi najun ju la'ixlaclhamp'aksin ju Dios.

Pus ju chunch lai tam lapanac si k'ox calhixajniyanta va tuchi ixtalakxtuch ju canavi. Chai vachu' chunch t'alakts'ipacxcavacan ju ixt'ak'ayanti tachi ju tu'u' q'uiu ju ch'ancanta la'ixquilhtu' ju k'ai xcan.

Para ju alactu'unin jantu ixt'achuncha tajunita. Ju yu'unch chunch tajunita tachi ju tu'u' lacat'icst'i amacxtalh ju sunlhi'an ju un.

Pus acsni tavananci ca'alakts'inik'oyanta ju ix'alactu'unti'an ju lapanacni ju Dios, pus ju alactu'unin ca'alacmamak'alhk'ajniya'. Para ju lack'oxin lapanacni na alacmapaini ju Dios.

Salmo 2

Mati' tu'u' ju lai catalhitalhk'amalh ju xalapanacni ju alacatam lack'ai lak'achak'anixni. Nin yuch ju xalac'ucxtinin catapacxalh ju tuchi lai catalhinavinilh amacxcrai ju Dios. Chai nin yuch ju ix'ucxtin'an ju alaclhca'ulanita ju israelitanin lai ca'alacnavinicalh ju amacxcrai.

Ju lapanacni tanajun ni jantu talacasq'uin ni ca'alaclhijunilh ju Dios nin yuch ju ucxtin ju lhca'ulai ju yuch lai calhinaulh.

Para ju Dios va alaclhits'i'in ju yu'unch. Pus ju Dios lana k'ox tachapun junita. Pus lana k'ox alac'ajk'aimai chai chini alacjuni:

“Ju quit'in iclhca'ula ju min'ucxtinch'an ju tichi xacsacxtuich. Pus yuchach ju calhinonk'oya' chux tus xalak'achak'an Jerusalén.”

Chai vachu' chini najunta ju Dios:

“Pus ju ucxtin ju tichi xaclhca'ulai ju chavai yuchach ju quints'ah. Ju chavai ixpaich xaquinavi ju quit'in ni xacxtaknich ju k'ox ix'atsucunti. Ju quit'in acmak'axtaknik'oya' ju lack'ai xalak'achak'anixni ju ani lacamunutpa'.

“Pus yuchach ju calhinonk'oya' ju ixlhilacaputs'un ju lacamunutpa'. Chai ju yuch ca'alacmamak'alhk'ajniya' ju lapanacni ixlhilacaputs'un ju lak'achak'anixni tachi lacatu'u' p'aksnic'a tsasnat ju tuchi hierro juncan.

“Pus palai k'ox cava ji xa'ucxtinin ju ali' lak'achak'anixni ni at'ai'ulat'itch ju quinquiyclaca'ica mas jantuch quilamispayau ju uxijnan. Pus ni jantu aquilaquiclaclaca'iyan ju quinlaclhama'aksin, ju chunch aclatalhk'amniyau ju uxitnan.”

Salmo 8

Jehová. QuinDios quinc'an unit'a. Chai uxint'ich ju lhina'un ju laquin'atsucunti quinc'an. Ju ixlhilacaputs'un ju lacamunutpa' na ta'alin ju lapanacni ju talak'ayayan.

Pus ju uxint'i alacmalak'ach'at'i ju ask'at'an ni catalac'ajk'aima ju na lactachapunin lapanacni. Chai vachu' alaclhimalak'ach'at'i ni catalacmasunilh ni jantu va k'aya catat'alsasan.

Chai acsni ictalakst'ai ju lact'iyan lana iclakts'in ju malhquiyu' chai ju lacst'acu ju navit'a chai alac'ulat'ach ju anch. Pus lana tasui ni lana k'ox k'ai'at ju uxint'i ji quinDios.

Pus ju acsnich quin'akstuch ju icsacmichokocan chai icnajunch: “Tis ixlacatach ju na va alaclhip'ast'ac'ach ju lapanacni ni lana va jantu tu'u' quintapalhni icjumpalhtau. Para lana quilamak'axtaknik'otau chux ju lac'atapacxat ju alin ju ani lacamunutpa'.”

Salmo 19

Ju t'iyan chai ju avilhchan, malhquiyu' chai ju lacst'acu lana tamalacasui ni alin pumatam Dios ju lana k'ox k'ai chai ni yuch ju navik'ojeta chux ju taxtokni ju alin.

Lana jantu tasq'uini ni aclacnaulh ixlacata ju yuch. Pus lana si lai talakts'ink'oju ixchux'an ju lapanacni mas vanta anchach ju catalactolhcha.

Pus ni lai camispau palai ixlacata ju Dios tasq'uini ni calhitamak'a'u tuchi najun ju ixlaclhama'aksin. Pus chux ju ani laclhama'aksin slivasalh na lack'oxi junita. Chai ju yuch na aquintalac'aklhtaijuyan ni palai na ca'ac'atsanau.

Ju ixmispaca ju ixlaclhama'aksin ju Dios palai na cak'achaniu ju yuch. Palai jantu ju tu'u' ix'uca ju t'axcat. Pus ju ixlaclhama'aksin quintamasuniyan tijuch ju catapasaya' ni jantu calajquiclaclaca'iyan. Pus ni caquiclaclaca'iyan ju Dios aquintaxtakniyan ju quintalhaja'an.



Aq'uimac'acxaninch ji Dios

Lana k'ox lhixcai ni laich cac'atsak'oju tachi chun ju macxcai ju naviyau.

Aq'uinmac'acxaninch ji Dios ixlacata chux ju macxcai taxtokni ju icnavi. Chai vachuch aq'uinmac'acxanin ixlacata ju quin'alactu'unti ju jantu icpast'ac'a.

Vachu' icsq'uiniyan ni jantu aq'uinmoc'onin ni acnavi ju macxcai taxtokni ju va laquinck'achat. Pus ni aq'uin'aklht'ai'uya'ich acjunach tachi ju tam lapanac ju jantu navi ju amacxcai taxtokni.

Quin'ucxtin Dios, anavit'ich ni chux ju tuchi acnaulh chai ju tuchi acpastaclh ni sich lamink'achat cava.

Salmo 22

Quimpai Dios, tajuch ni va xaq'uinmoc'o'ulap'alai. Tajuch ni va jantu q'uink'elht'aip'alai acsni ict'achivinan.

Pus ju mak'ania quinlacpa'itni quijnan lana k'ox ixtalachhilaksiyan. Chai ju uxint'i lana k'ox ix'alac'aklht'ai'ui.

Para ju quit'in ju chavai tachi ju lanach va si lhamak'an ju icpacxanta. Pus lanach va si quintalhimamaxanik'ojui ni va iclhilaksiyanch.

Para mas chunchach ju ictapasai ju quit'in vatach iclhilaksiyanch. Pus yuch vatach iclhisq'uiniyanch lamapainin ni aq'uin'aklht'ai'ut'ich. Pus lanach mati' ju quintachaput chai na ijquicxixach.

Pus ju alactu'unulapanacni quintamac'atsani ju laquinmaca' chai vachu' ju laquinch'aja'. Chai na tak'achan acsni icmak'alhk'ajnan. Pus ju quimpumpu' tat'ajunch lalhvakin sia lhiyu'unch. Chai tat'ajunch lhilaslaejn tis chavaich ju calhi'ana' ju k'elhtam k'ai quimpumpu'.

Aq'uin'aklht'ai'ut'ich lamapainin.

Aclak'ayaya' ju Dios la'ix'ucxlacapu'an ju quin'alak'avin israelitanin. Pus ju Dios quinmapusp'itnilh ju quinchivinti acsni xact'achivinin.

Salmo 23

Ju Dios chunch quilhist'ac'a tachi ju tam k'ox lapanac ju ixlhistaacna' calhnilu. Ju la'ixmacni vatach acpacxanach chux ju tuchi acmaktasq'uinalhch. Chai yuch ju aquinlhist'ac'a' vanta anchach ju ac'ana'.

Chai ju Dios palai lhu ju quinxakni; jantu va chunch tachi ju icmaktasq'uini. Chai vachu' quinmak'elhtaxtui ju la'ixmaca'an ju quin'alact'alaxcai.

Pus chux ju laquin'atsucunti vatach laca'amapainintich chai lacatak'oxamajk'ayanti ju aquinlhist'ac'a'. Chai anchach ju act'atolhk'alhiyanta ju Dios junta vilhcha.

Salmo 34

Acxtakniya' lak'ailakts'iuch ju Dios chai vatach aclak'ayayach. Pus ju jantu na talact'ak'ayai ju la'ix'alhunut'an na catalack'achana' acsni aquintak'esmatniya'. Va ch'anxtamch calak'ayau ju Dios.

Icsq'uinalh ju Dios ni aquin'aklhtaiju. Chai ju yuch quink'esmatnilh ju quinchivinti acsni xact'achivinin. Chai quinmak'elhtaxtulh ixlacata junta na xactalhanantach.

Ju Dios malakachani pumatam ix'anquilh ju calhistaclu ju lapanac ju vasalh talhoni ju yuch. Chai vachu' alacmak'elhtaxtui ixlacata va tuchi lhamak'an ju catapacxalh.

Pus alakts'int'anut'itch chai alhilaksit'itch ju Dios. Chai alakts'ina'it'itch tas ixlhik'oxich lapanac alact'alai ju vasalh talhilaksi ju yuch.

Pus ni vasalh q'uiclac'a'i ju Dios lana jantu tu'u' at'imak'anc'acxt'i ju tuchi makt'asq'uinch. Para ju lapanac ju jantu lhilaksi ju Dios na lhu ixlhamak'an capacxana'. Chai vachu' camak'alhk'ajnana' ju ixchavan.

Pus ni k'ox ts'uc'up'ut'un ju ani lacamunutpa' chai ni lakalhu c'ata ju ts'uc'up'ut'un tasq'uini ni na alajc'ats'an ixnajunca ju amacxcuai taxtokni chai ju ta'eklhtamat chivinti. Pus jantu xamati' mint'alapanac alhimakch'ap'u. Chai jantu xamati' at'alasat'i. Nin yuchi ni xamati' alhip'uxc'onin ixt'alak'ajica.

Pus ju Dios alack'esmatni ju ixchivinti'an ju lack'oxin lapanacni acsni tat'achivinin. Para ju alactu'unulapanacni va ix'alact'alaxcai'an tajunita.

Chai ju tam xamati' ju na k'ox lapanac junita lai na lhu camak'alhk'ajnalh. Para ju Dios camak'elhtaxtuya' ju la'ixlhamak'an ju capacxalh. Chai ju Dios jantu catimacaaulh ni tu'u' ixlac'alucutni ju calact'ek'enicalh ju yuch lapanac.

Para ju alactu'unulapanac va ix'akstuch ju navichokoi ju ixlhamak'an ixlacata ju ix'alactu'unti ju navi.

Salmo 37

Ju uxint'i jantu chunch a'ump'ut'u tachi ju tanavi ju macxcuai taxtokni. Pus tachi ju yu'unch lapanacni lana va ts'alhti ta'aclai tachi acsni xlok'a ju ach'itin.



Jantu church a'ump'ut'u tach ju tanavi ju macxcuai taxtokni

Palai na k'ox cava ni vatach alhilaksit'ich ju Dios ju uxint'i. Chai vatach anavit'ich ju tuchi k'ox lhiulai ju yuch. Pus ju chunch ju Dios caxtakniyan tasmalhch ju palai k'ach'ani ni min'anu' cava.

Amoc'oninch ju min'atsucunti ju la'ixmacni ju Dios. Chai ju Dios ca'amamachakxaniya' ixchux'an ju lapanacni ni navi ju soknic'a ju uxint'i. Chai ni na k'ox lapanac unit'a.

Para tasq'uini ni jantu jeks a'ut'i chai ap'acxach tus acsni camuctaxtuya' ju tuchi k'elhtasunitan ju Dios. Jantu jeks a'ut'i nin yuch ni alhacchi'inin ju alactu'unulapanac acsni lhitatui ju tuchi lacasq'uin. Pus ju yuch va ts'alhtich lhitatui ni vatach alaclhimakchaput'ajunch ju ali'in ixt'alapanacni. Ju uxint'i jantu chunch alat'i tachi ju talai ju yu'unch.

Ap'ast'act'ich k'ox ni ca'alacmac'acxaya' ju Dios ju alactu'unulapanacni. Para ca'alacmoconiya' ni k'ox catatsuculh ju talhilaksi ju yuch.

Pus jantuch na va mak'an cativa mati'inch catitava ju alactu'unulapanacni. Chai ju acsnich ju jantuch na va talact'ak'ayai ju la'ix'atalacpast'ac'at'an ix'akstu'an catalac'alinach ju ixlacat'un'an. Chai sich k'ox catatsucuk'oya'.

Ju alactu'unulapanacni mas na talacxcaji ju lack'oxin lapanacni, ju Dios va alaclhits'i'in. Pus ju yuch c'atsai ni jantuch na va mak'an catitatsuculh ju alactu'unulapanacni.

Palai k'ox ni va quilhpatini' acva chai k'ox lapanac acva. Pus palai jantu k'ox ni mak'ali' acva chai ni na va alactu'unulapanac acva. Pus ca'alina' lakatam avilhchan acsni ca'alacmamak'alhk'ajniya' ju Dios ju alactu'unulapanacni. Chai ju acsni ca'alacxtakniya' ju ixlhak'ailakts'inti'an ju lack'oxin lapanacni.

Pus ju lack'oxin lapanacni na ta'amapaininin. Para ju alactu'unulapanacni tamats'isq'uin ju tumin chai jantuch ta'amapalanan. Pus ju lack'oxin lapanacni si atalaninichivinti ju talhichivinin. Chai vachu' tamispai chai taquiclaca'i ju ixlaclhamap'aksin ju Dios. Para ju alactu'unin talhipuxconi tayu laich catalacpumakni.

Para mas chunchach ju talai camina' lakatam avilhchan ju ca'alacmamak'alhk'ajniya' ju Dios ju alactu'unulapanacni. Chai vachu' ca'alacxtakniya' ju ixlhak'ailakts'inti'an ju lack'oxin lapanacni.

Salmo 40

Ju quit'in icpacxalh tus acsni aquin'aklhtaijulhch ju Dios. Pus ju yuch lana quin'aklhtaiju. Pus tachi ju va quinmajcutulhch junta na puculhucnic'a junita chai junta na aktsamanta ju pulhk'om. Chai tachi ju va la'ix'ucxnich ju k'ai chiux ju jantu lana lai talacnavi ju xaquin'ulai.

Chai quixtaknilh lakatam sast'i milhpat ju laich acpulak'aya ju yuch. Acsni aquintalakts'ina' ni ict'ajun milhpana', pus na lhu ju catac'atsaya' tas tucanch junita ju Dios. Chai ju acsnich vachuch catalaniya' ixlhilaksica ju Dios.

Pus ju talhilaksi ju Dios si k'ox talhixajniyacha ju tuchi tanavi. Quin'ucxtin, slivasalh na lack'ai lhamak'an ju tuchi lacnavit'a ju uxint'i. Ju uxint'i jantu chunch unit'a tachi ju jantuch ixtavasalanti diosnin. Pus chux ju tuchi navich ju uxint'i sich va quimpu'aklhtaijucan quijnan.

Chai va laich ac'alacjunk'o ixchux'an ju lapanacni ixlacata tas tijchux taxtokni ju navit'a ju uxint'i. Para lana mati' ju quinchivinti tachi ju laich acpunavi.

Chai ju uxint'i jant'u lac'asq'uin ni acmagninin ju tu'u' lac'atapacxat tachi ju tu'u' lhak'ailakts'inti. Pus ju uxint'i va yuch ju lac'asq'uin ni ack'esmatninch ju minlaclhamap'aksin chai ni ajquiclaca'inch. Chai ju quit'in lana k'ox vasalh iclaczispaputun ju minlaclhamap'aksin. Pus ju chunch laich acnavi ju tuchi lac'asq'uin ni acnavi.

Pus ju uxint'i k'oxich c'ats'ai ni vas ic'alacjunita ju lapanacni tas malhchi ju k'oxich lhiulai. Chai lana jantu tu'u' icmatank'anui ixlacata chux ju tuchi k'oxich ju navit'a. Pus alai lana ic'alacjunk'ojui ixchux'an ju lapanacni.

Ju chavai na alin ju quinlhamak'an. Pus yuch iclhishq'uiniyan ni aq'uin'aklht'ai'ut'ich. Pus amac'auch ni chach talacmak'alhk'ajnalh ju quin'alact'alaxcai. Para chux ju tichi catalak'ayaputun chai ju catasq'uinin a'aklhtaijunti laich catalak'ayayan.

Quin'ucxtin, lana k'ox icmaktasq'uini ju min'a'aklhtaijunti. Va ts'alhtich aq'uint'at'i aklhtaijunu!. Pus va uxint'ich ju lai aq'uin'aklht'ai'ut'i.

Esta ilustración
no está
disponible.

Ju Dios sacstulh ju xalak'achak'an Jerusalén

Salmo 46

Va yuch ju Dios ju lai quinta'aklhtaijuyan acsni pacxanau ju quinlhamak'an'an. Pus ixliyuchach jantuch lhitalhananau mas ni ca'aclalh ju lacamunutpa'!

Ju Dios sacstulh ju xalak'achak'an Jerusalén ni anchach ju ixlak'achak'an cajuna' junta laich catola'. Chai calhist'ac'a' ju yuch lak'achak'an mas ni calact'ilhicalh ju ali' lak'achak'anixni.

Ju Jehová yuchach ju Dios ju lak'aya ju Jacob. Pus ju yuch Dios lana k'ox quintat'onan aklhtaijunun.

Pus alakts'int'itchi tas xalhilact'ilhich ju alich xalak'achak'anixni ju ani lacamunutpa'. Pus lana jantu alacmoconi ni catatailhi'ah ju quint'aliasaca'an. Chai lana alacvak'alhinik'o chux ju ixlacpulasan'an.

Pus ju yuch najunta ni chach tamamacta ju yu'unch lapanacni ju quint'aliasaca'an ju israelitanin juntau. Chai va lhek'achach aquintalact'atolan ni laich catalakts'ilh ni yuch ju stavasalanti Dios junita. Chai ni yuch ju lhinajun ju ixlhilacaputs'un ju lacamunutpa'.

Pus ju yuch k'ai Dios lana k'ox quintat'onan aklhtaijunun ju quijsnan'an ju israelitanin juntau.

Salmo 51

Quimpai Dios, va lamin'amapainintich ju aq'uimac'acxanin. Pus ju quit'in iclak'amispaich ni icnavitach tu'u' ju na amacxciai.

Chai ijc'atsaich ni jantuch k'ox q'uinlakts'in ixlacata ju quin'alactu'unti. Pus ju uxint'i p'acxant'ach ju lhamap'aksin ni laich q'uinch'ivixt'ak'a chai ni aq'uinmamak'alhk'ajnit'ich.

Pus ju quit'in na ic'alactu'unu' icjunita tus acsni tuca' xactsucui. Para lamapainin icsq'uiniyan, aq'uinmac'acxaninch. Chai aq'uinmoc'oninch ni k'oxich lhek'acha actsucuchokolh. Pus anavit'ich ni k'oxich cava ju quin'alhunut chai ni vatach ajquiclaca'iputunch.

Jantu na va makat aq'uinmalak'ach'at'i junt'a vilht'i.

Chai jantu amak'osut'i ju minSpiritu ju laquinmacni. Pus palai k'ox ni anavit'ich ni lhek'acha actsucuchokolh ni uxint'ich ju q'uinmak'elht'axt'ut'a. Chai amac'auch ni aquin'aklhtaijulhch ju minSpiritu Santo.

Pus ju chunch laich ac'alacmasuniya' vachu' ju ali'in alactu'unin tayu laich catapuquiclaca'iyan ju minlaclhamap'aksin. Aq'uinmac'acxaninch ju lamin'amapaininti. Pus ju chunch laich aclak'ayayan.

Pus ju quit'in ijc'atsai ni jantu yuch ju k'ach'ani ni aclacmakinin ju lac'atapacxat tachi ju va minlaclhak'ailakts'intich cava. Pus ju ixlacata ju chunch alai icmak'axtakniyan ju quin'atsucunti ni jantuch na va aclhit'ak'aya ju tu'u'.

Pus ju chavai axt'akninch ju lak'achak'an Jerusalén tachi chun ju tuchi maktasq'uini chai jantuch tu'u' camak'anc'acxli. Chai ju lapanacni ju tat'ajun ju anch anavit'ich ni chach palai, palai taquiclaca'in ju minlaclhamap'aksin. Pus chunchach ju laich k'ox alhiulaya'i ju lac'atapacxat yaaclalakxavaniyau.

Salmo 73

Ju Dios slivasalh na k'ox alact'alai ju lapanacni ju jantuch tanavi ju macxciai taxtokni.

Lanach va lacats'unin xacmocomputunch ixlaca'ica ni vasalh na k'ox alact'alai ju Dios ju lapanacni ju jantu tanavi ju amacxciai taxtokni acsni iclakts'ilh ni na k'ox ta'anani ju alactu'unin. Pus lanach k'ox mak'alinin tajunita ni na va talaclhimakchapuich ju ali'in lapanacni. Chai vachu' lana k'ox macxciai talacchivinin ixlacata ju Dios. Chai vachu' lana k'ox macxciai talhichivinin ju lapanacni ju talak'ayai ju Dios. Tasui ni tachi ju va jantu tu'u' lai catitatapasalh ju la'ix'atsucunti'an.

Mas yu'unchach ju talhilaksi ju Dios talaca'i acsni xatalakts'in ju chunch. Chai tapastaclich ni jantu lhitalpalai ni aclak'aya ju Dios.

Pus vachuch ju quit'in va lacats'uninch xaclaca'iputunch ju chunchach atac'atsanti. Para ni chunchach xaclah pus tachi ju va jantuch ixtavasalanti xact'ajun lak'ayana' ju Dios. Pus lanach vatach xacpastact'ajunch ixlacata ju ani lhamak'an.

Para lana jantu lai xacmachakxai tus acsni xactanuich ju la'ixpujitat ju Dios. Pus anchach ju quinmalacasunilh ju Dios ni vasalh ca'alacmamak'alhk'ajniya' ju alactu'unin. Pus mas lanach va quinlhitonto ju xacpastact'ajun ju Dios vatach quint'ajunch aklhtaijunu' chux ju avilhchan.

Va yuch ju Dios ju iclhilaksi ju laquin'atsucunti chai va yuchach ju icmaktasq'uini.

Pus ju Dios ca'alacmamak'alhk'ajniya' ju lapanacni ju jantuch cataquiclac'a'iya'. Para ju quit'in k'oxich xacpast'ac'a ni aclhilaksiya' ju yuch.

Salmo 89

Pus ju laquinmilhpat chinich acnona':

Quin'ucxtin, tas va quintilalhimapainik'oyauch. Chai akts'iya quinla'aklhtaijuyau tachi ju na'un't'a. Chai lana jantu tavanana quinlamocoyoyau.

Pus lana mati' xamat'i ju mint'achuncha cava tachi ju uxint'i ju ani lacat'un nin anch ju lact'iyan. Pus ju uxint'i lana k'ox tachapun'at. Chai lana uxint'i ju alaclhi'unk'o'ui tachi chun ju taxtokni ju alin ju ani lacamunutpa'.

Chai vachu' ju uxint'i na k'ox lapanac'at chai chunch ju alacnavini ju lapanacni tachi ju lhijunch ni alacnavinin. Chai lana k'ox amap'aininin. Pus ju lana k'ox talhilaksiyan vatach lhek'achach tat'ajun. Pus chux ju israelitanin icjuntau na k'ox quinta'anananitan ju minlacata.

Pus ju uxint'i k'elht'asunit'a ju minlapanac David acsni tavanana sacst'u ni yuch ju ucxtin cajuna'. Chai unit'a ni pumatam ixpapanti ju vatach ix'ucxtinch'an cajuna' ju israelitanin. Chai vachu' k'elht'asunin ni a'aklht'ai'uya' ix'alact'alalhajaca ju ix'alact'alaxcai. Chai vachu' un ni lana k'ox cat'ak'ayaya' ju yuch junta cata'ucxtinitola'. Chai vachu' un ni xa'ucxtin anaviya' ju lacalakatam junta lana k'ox k'ai lacat'un junita.

Chai vachu' un ni alacmamak'alhk'ajniya' ju ix'apapanatni acsni tavanana jantu cataquiclaca'iyan. Para ju uxint'i amuct'axt'uniya'i ju tuchi k'elht'asunit'a.

Para mas chunchach ju na'un't'a ju uxint'i mac'a'un't'a ni aquintalact'alalhajan ju quin'alact'alaxcai quinc'an.

Pus va ts'alhtich aquinla'aklhtaiju. Amuct'axt'ut'ich ju tuchi quinlak'elhtasunitau ji quin'ucxtin. Pus jantuch at'ailhip'i ju quintalhk'amnica ju quijnan.

Pus calak'ayauch quinchux'an ju Dios tus va tavananch cava.

Salmo 91

Ju Dios quintalhist'ac'an quinchux'an ju lhilaksiyauch ju yuch. Pus lana jantu macajun ni tu'u' macxcai catapasau.

Pus calakts'inauch ju Dios acsni catsucuya' alacmamak'alhk'ajnini' ju alactu'unulapanacni. Para ju quijnan'an lana jantu tu'u' catimak'alhk'ajnau ni yuchach ju lhilakiyau. Pus ju Dios alacmalakachai ju ix'anquilhnin ni aquintalhistacnich vanta anchach ju ca'au.

Chai ju Dios chini najunta:

"Ju ani lapanac acmak'elhtaxtuya' ju la'ixlhamak'an ni na va quinmapaini chai quinmispai. Pus acsni tavanan aquint'achivina' ixlacata ju tu'u' ixmaktasq'uinit ju quit'in ack'elhtaya'. Chai lana acmak'elhtaxtuya' ju la'ixlhamak'an.

"Pus acnaviya' ni lana k'ox calak'amispacalh ju yuch lapanac. Chai vachu' acmoconiya' ni lana k'ox lakalhu c'ata catsuculh. Pus ju chunch laich calaclhek'achana' ixlacata ju tuchi lack'oxi taxtokni ju icnavita ju ixlacata."

Salmo 95

Camilhpaniuch ju Jehová lacak'achat. Pus yuchach Dios ju quintamak'elhtaxtuyan ju laquinlhamakan'an. Catanuch ju la'ixpujitat ixtaknica lak'ailakts'iuch chai camilhpaniuch.

Pus chunchach ju canaviu ni yuchach ju palai k'ai Dios junta ju Jehová. Jantu yu'unch ju diosnin ju talak'ayai ju ali'in lapanacni. Pus yuchach ju xanavik'ooui chux ju alama chai ju lacat'un. Chai vachu' yuch ju najun tijuch ju tapasai junta palai lacpakmakat ju ani lacamunutpa'.

Pus tasq'uini ni cataquilhputaniu chai cata'aktsok'otaniu ju la'ix'ucxlacapu' ju Dios. Pus yuchach ju xaquintanaviyan

ni yuchach ju quinDios'an junita. Chai ju quijnan'an ixapanacnich juntau.

Pus ni caquiclac'a'iyau calakts'inau tas tucanch junita ju ixtachaput.

Pus ju Dios chini najunta:

“Pus jantu chunch a'unt'it tachi ju mak'ania minlacpa'itnich'an acsni ixtalac'uxcunt'ajun ix'alhtanti'an junta na axixninta lacat'un. Pus ju yu'unch quintat'alak'ailh mas ixtalakts'intach chux ju tuchi xacnavitach ju ixlacata'an.

“Pus ixliyuchach xac'alaclhitalhk'amnitach ju t'up'uxam c'ata ju yu'unch. Pus jantuch ic'alacmoconilh ni lai catatanu ju xalacat'un Canaán, ni anchach ju laich ixtalac'astacnalh. Pus ixliyuchach jantuch ic'alaclhimoconilh ni lai catatanu ni va jantuch quintaquiclaca'nilh ju quinchivinti.”

Salmo 100

Pus chux ju vilacalh ju ani lacamunutpa' tasq'uini ni calak'ayacalh ju Jehová chai lacak'achat camilhpanicalh.

Pus tasq'uini ni cac'atsacalh ni yuchach ju istavasalanti Dios junita. Pus yuchach ju xaquintanaviyan chai ixliyuchach ix'anuch lhijuntau.

Pus chunch juntau tachi ju tu'uch quilhmactam calhnilu. Chai ju Dios yuchach ju ixlhistacna' calhnilu junita.

Esta ilustración
no está
disponible.

Chunch juntau tachi ju tu'uch quilhmactam calhnilu

Tasq'uini ni ca'auch ju la'ixpujitat xtakninin lak'ailakts'iuch. Chai tasq'uini ni anchach ju ca'au lak'ayanin ni na va k'oxich lapanaç junita ju yuch.

Pus ju yuch vatach aquintamapainiyanch. Chai jantu tavanán aquintatalacmoco'ulan.

Salmo 103

Pus iclak'ayai ju Dios ixlhichux ju quin'alhunut. Pus lana jantu ijcapputun tu'u' ixlacata ju taxtokni ju tuchi lai aclhixtaknilh lak'ailakts'iuch.

Pus ju yuch quinmac'acxanik'ojui ixlacata chux ju tuchi macxcai ju icnavita. Chai quinc'uch'ui acsni ict'ajun mak'alhk'ajna'. Quinmak'elhtaxtui acsni icnipayutun chai navi ni vatach k'oxich aquin'ananih.

Pus ju yuch na k'ox lapanac junita chai na navi ju soknic'a. Pus talacasunilh ju Moisés chai ju ali'inch israelitanin tas tucanch junita.

Chai ju yuch jantu lana va ts'alhti quintatalhk'amniyan. Chai lanach vatach quintamac'acxaniputunanch ju quin'alactu'unti'an. Pus palai k'ox quintanaviniyan; jantu va chunch tachi ju ixlhijun ni xaquintanavinin.

Pus ju yuch c'atsai ni lana mati' ju quintachaput'an chai ni va lapanacni juntau. Pus ixlihiyuchach lanach k'ox lapanac quintalhit'alayan. Pus chunchach quintat'alayan tachi ju tam xapai alact'alai ju is'ask'at'an. Chai quintamac'acxaniyan ixlacata ju tuchi macxcai ju naviyau.

Pus jantu mak'an tsucuyau ju ani lacamunutpa'. Va chunch juntau tachi ju tu'u' ach'itin u tu'u' xanti ju vats'alhti xixa. Para ju Dios jantu tavanan mamaactai ixmapainica tichi chavaich ju talhoni chai ju quiclcaca'i ju ixchivinti.

Dios ju lhinajun ju ani lacamunutpa' chai ju lact'ian. Pus ju anquilhnin tasq'uini ni catalak'aya ju Dios. Chai chux ju tuchi navita ju Dios catalak'ayaya'. Chai ju quit'in vachu' aclak'ayaya' ixlhichux ju quin'alhunut.

Salmo 110

Ju Dios chini junilh ju quin'ucxtin:

"Laquinlhicana ju at'a'ulh tus acsni ac'alamac'acxak'oyach ju min'alact'alaxcaí."

Chai Dios ju moconi ni cata'ucxtinitavi ju tam ucxtin. Pus yuch ju xtakni ju ix'aklhtaijunti tus acsni tavanant tsucui. Chai vachu' k'elhtasunita ni yuchach ju xak'ai pali cajunk'alhiya'. Pus chunch cajuna' tachi ju ixpupali ixjunita ju Melquisedec. Pus ju ani ucxtin lana k'ox tachapun cajuna'.

Salmo 118

Na k'ox lhixajacha acsni xtaknican lak'ailakts'iuch ju Dios. Chai tasq'uini ni ixchux'an ju israelitanin ju catalaclajunilh ni jantu tavanana mamactai ju Dios ju quinmapainica'an.

Pus ju quit'in ict'achivinilh ju Dios chai ju yuch quinmak'elhtaxtulh ju la'ixmaca'an ju quin'alact'alaxcai. Chai jantu lhitapalai mas va ta chunchach quin'alact'alaxcai acpacxalh. Pus ju Dios aquin'aklhtaijuya' ix'alact'alalhajaca. Pus ju chavai iclak'ayai ju Dios ixlacata ni xaquin'aklhtaijui ix'alact'alalhajaca ju quin'alact'alaxcai.

Pus ju anu' chiux ju jantu tu'u' ixtapalhni ixtalhilhcata ju ixyonin chaka' yuchach ju palai lana k'ox xalhitapalai. Pus ju ani taxtokni Dios ju xanavi, chai yuchach na iclhilhamak'anininauch.

Pus ju Dios lana k'ox k'ai lhamak'an ju tuchi xanavi ju chavai avilhchan. Pus ixlihiyuchach vatach calhilack'achanauch.

Quin'ucxtin, lamapainin iclasq'uiniyau ni at'ailhip'ich quinmak'elhtaxtuca ju la'ixmacni'an ju quin'alact'alaxcai quinc'an. Chai at'ailhip'ich ju quin'aklhtaijua quinc'an.

Ju Dios lana k'ox t'ajun aklhtaijunu' ju tichi xaminch navini' ju ixlhich'alhcat.

Pus tasq'uini ni quinchux'an ju caxtakniu lak'ailakts'iuch ju Dios. Pus ju yuch lana jantu tavanana mamactai ju quinmapainica'an.

Salmo 119

Ju ani salmo lana k'ox lhman junita. Chai ju anch quintamasuniyan tayu laich capumachakxayau. Chai vachu' lai capuquicla'iyau ju ixlaclahamap'aksin ju Dios. Pus ju ani ats'oknut najunta ixlacata ju ali' taxtokni ju najunta ju laca'ani salmo.

Pus ju quicla'ju ixlaclahamap'aksin ju Dios na k'ox anani. Chai ju ts'alh ju quicla'ju ixlaclahamap'aksin ju Dios na k'ox lapanac cajuna'. Chai ju la'ix'atsucunti jantu tu'u' lai catilhimuc'acalh.

Pus icnavi talakmask'atin minlak'ayaca ixlhichux ju quin'alhunut ji Quin'ucxtin. Jantu aq'uinmoc'onin ni acmamacta ju minquicla'ica ju minlaclhamap'aksin.

Pus lana vatach icpastact'ajunch ju minlaclhamap'aksin ni jantuch acnavi tu'u' amacxcai. Aq'uin'aklht'ai'ut'ich ni laich acmachakxa tachi chun ju k'ox ju alin ju laminlaclhamap'aksin ju quilacata.

Pus acsni jantu xaclaca'i ju minlaclhamap'aksin na icmak'alhk'ajnalh ixlacata ju chunch. Pus ixlihiyuchach iclhilaca'ich ju chavai.

Quin'ucxtin, ju minlaclhamap'aksin jantu tavanan aclai. Chai acsni iclhitamaka'ui ju minlaclhamap'aksin palai na ic'atalaninin; palai jantu ju quin'alact'alaxcai chai quin'amamak'a'unin chai ju lack'ayalapanacni.

Pus ju minchivinti lana k'ox quinmak'ank'achai; palai jantu ju t'axcat nin yuch ju oro. Pus chunchach junita tachi ju tu'u' maclhcu ni quinmasuni tijuch ju lai k'oxi acnavi. Chai lana k'ox quinma'amak'anini ni na va lhu lapanacni ju jantu talaca'iputun ju minlaclhamap'aksin.

Esta ilustración
no está
disponible.

Ju minchivinti chunchach junita tachi ju tu'u' maclhcu

Salmo 121

Ju vasalh lai quinta'aklhtaijuyan va yuchach ju Jehová. Pus yuchach ju xanavi ju t'iyan chai ju lacat'un. Pus ju yuch lana jantu tavanan lhtatai. Chai lana vatach quintalhistactanch.

Chai ju yuch jantu macajun ni tu'u' macxcai camilh ju laqui'atsucunti'an.

Salmo 135

Calak'ayauch ju Dios. Alak'ayat'it minchux'an ju ch'alhe'atnaniyat'it ju la'ixpujitat ju Dios. Pus slivasalh na k'ox ju ixlak'ayaca ju Dios chai ju ixmilhpanica.

Pus yuch ju quintasacstutan ju quijsnan'an ju israelitanin juntau ni ixlapanacnich cajumvi.

Pus ju yuch lana k'ox k'ai chai ju yuch palai lana k'ox t'ak'ayata; palai jantu ju ali'in diosnin. Pus ju yuch navi va tuchich ju lacasq'un. Macamin ju un chai ju xcan.

Pus alacmaknik'o ixchux'an ju p'ulhnan tatsucuta ists'alan'an ju egipcionin. Chai vachu' alacmakninizik'o ju xap'ulhnan ixtapakta ju ixlac'atapacxat'an. Pus vachu' alacmakni ju xalack'ajin ucxtinin ju na lactachapunin ixtajunita. Chai alactai'inilh ju ixlaclacat'un'an ju xaquintalacxtakniyanch ju quijsnan'an.

Ji quin'ucxtin, ju lapanacni vatach catalak'ayayanch.

Pus ju Dios alacnavini ju lapanacni tachi ju lhijunch ni canavi chai vachu' ca'alacmac'acxaniya' ju ix'alactu'unti'an.



Ju diosnin ju talak'ayai si ixtanavin tam lapanac junta

Para ju diosnin ju talak'ayai ju amachak'an ju ali'in lak'achak'anixni va si ixtanavin tam lapanac junita. Ju yu'unch tapacxanta ju ixquilihni'an para jantu lai tapuchivinin. Alin ju ixlakchulh'an para jantu lai tapalacavanan. Alin ju ixpak'esmatna'an para jantu lai tapak'esmatnan. Chai alin ju ixlhixin'an para jantu lai tapaxani.

Pus ju ixnavinin ju diosnin chai ju talaca'ich ni cata'aklhtaijuya' ju anu' diosnin pus vachu' jantu tu'u' ixtapalhni'an catajuna!. Pus chunchach catalhitalacxtuya' tachi ju diosninch ju q'uiu lhinavicanta.

Para quinchux'an ju israelitanin juntau tasq'uinich ni calak'ayauch ju Jehová. Pus yuchach ju ixtavasalantich Dios junita. Chai ju Dios anch t'ajun ju la'ixpujitat ju yacha ju xalak'achak'an Jerusalén.

Salmo 137

Pus ju quijnan ju israelitanin icjuntau, xaclactolau ju la'ixquilhtu' ju xak'ai xcan ju xalak'achak'an Babilonia. Pus ju yuch lak'achak'an xa'aktsulh junita ju xalacat'un Caldea. Pus ju israelitanin icjuntau anchach ju xaclac'amak'aninitolau acsni xacpast'ac'au ni va ixlact'ilhicantach ju xalak'achak'an Jerusalén.

Ju lapanacni ju amachak'an Caldea ju xaquintalhi'antanch ju Babilonia xaquintasq'uiniyanch ni aclacmilhpauch ju xamilhpat ju lak'achak'an Jerusalén. Para ju quijnan jantu lai xacnaviyau ju chunch junta jantuch quilacat'un quijnan ixjunita.

Pus jantu tavanán acticaplh ju xalak'achak'an Jerusalén ni yuchach ju ixlak'achak'an junita ju Dios. Chai ju quit'in palai na lhitapalai ichhiulai ju yuch; palai jantu ju ali' xataxtokni ju ani lacamunutpa'.

Quin'ucxtin amamak'alhk'ajnit'ich ju xalapanacni ju lak'achak'an Edom. Pus ju yu'unch lana k'ox xatalaclhek'achan acsni xatalact'ilhi ju Caldeonin ju xalak'achak'an Jerusalén.

Pus ju quit'in ijc'atsai ni camina' avilhchan acsni ca'alacmamak'alhk'ajniya' ju Dios ju Caldeonin. Pus chunch ju ca'alacnaviya' ixlacata chux ju tuchi macxciai taxtokni ju xaquintanaviniyan.

Salmo 139

Quin'ucxtin, ju uxint'i misp'ak'o'ui chux ju tuchi icnavi
chai chux ju tuchi icnajun. Pus lana jantu ijc'atsai t'as
lhinavich ju chunch. Para ijc'atsai ni jantu tavanan lai
actitatank'anunin jinta' ju lamin'ucxlacapu'.

Pus ju uxint'i vanta anchach ju vilht'i. Chai lai lhit'a'uc'an
ju lact'iyan chai ju la'ixtank'ajni ju lacat'un. Pus lai lakts'in ju
tuchi t'ajun tapasana' mas na caputs'isli ju makspa'.

Pus uxint'i ju xaq'uinavi ju la'ixpamaksk'at'an ju quinati.
Pus ju quit'in aclak'ayayan ju uxint'i ni lana k'ox k'ai'ati. Chai
ixlacata ni vachu' navi ju lana k'ox k'ai lhamak'an. Pus ju
uxint'i lana k'ox misp'ai tas tucanch junita ju quinlacatuna
chai tas tucanch icjunita ju quit'in. Pus lana jantu lai icput'ek'e
ixlacata chux ju taxtokni ju tuchi p'ast'ac'a ju quinlacata.
Pus palai na lhu junita; palai jantu ju xacucu ju alin ju
la'ixquilhtu' ju alama.

Chai lana k'ox ic'alacxcaji ju tichi taxcayan.
Alacmamac'ahk'ajnit'ich ji quin'ucxtin.

Pus ju quit'in k'oxich aq'uinmisp'at'i ji quinDios. Pus ju
uxint'i misp'ak'o'ui chux ju quin'atalacpast'ac'at. Chai jantu
aq'uinmoc'onin ixnavica tu'u' ju tuchi jantu k'ox lhiulai
ju uxint'i. Pus aq'uin'aklht'ai'ut'ich ixnavica ju tuchi
lac'asq'uinch ni acnavi.

Salmo 146

Aclak'ayaya' ju Dios acsni ictit'ajunca' ju ani lacamunutpa'.
Chai vachu' acmilhpaniya'.

Pus jantu tasq'uini ni ca'alaclhilaksiu ju ucxtinin nin yuch
ju apumatam lapanac acsni maktasq'uiniyau ju a'aklhtaijunti.
Pus ju yu'unch jantu lai aquintita'aklhtaijun. Pus ju yu'unch
vachu' cachina' ju avilhchan acsni catalacniya'.

Para ju Dios ju lak'aya ju Jacob na a'aklhtaijunun. Chai ju
lapanac ju lhlaksi ju yuch Dios lana k'ox anani. Pus yuchach
ju xanavi ju lacat'un, t'iyan, alama chai chux ju tuchi alinch ju
anch.

Ju Dios na alacmapaini ju na tamak'ahk'ajnan ju
la'ixmacni'an ju ali'in. Chai ju yuch alacmavai ju lapanacni
ju na tachavani. Chai vachu' alacmaxtui ju lacapulach'in
ju va alact'alhnucanta. Chai vachu' alacmalacavani ju

alak'ach'ixnin. Chai vachu' alacmatank'oxajk'ayai ju va talac'amak'aninin.

Pus ju Dios lana k'ox alacmapaini ju tanavi ju k'ox. Chai vachu' alaclhist'ac'a ju va alacnimocontilacanta chak'olun chai ju ask'at'an ju matich ixpai'an, ixnati'an chai vachu' ju tavilanalh ju xalacat'un Israel ju jantuch amachak'an anch tajunita. Para ju alactu'unin na alacmamak'alhk'ajni.

Pus ju Dios cata'ucxtinitolhk'alhiya' ixlhilacaputs'un ju lacamunutpa' tus va tavananch cava. Calak'ayauch ju Dios quinchux'an ju vilau ju ani lacamunutpa'.

Ju ali' ix'atalaninichivinti'an ju israelitanin

Maxtucanta ju lacaProverbios 1–31

*Ju israelitanin lana k'ox lhu ixtapacxanta ju
ix'atalaninichivinti'an ju va ixlhi'akstu'an ju ixtalaclajuni. Ju ali'
chivinti ts'ok'ulacanta ju laxa'alhiqui ju lacchivinti ju Proverbios
juncan.*

*Pus ju k'ai ucxtin Salomón lana k'ox atalanini' ixjunita. Chai
ju yuch lana k'ox lhu ju lacchivinti ju xats'ok'ulai Para ju ali'
lacchivinti ali'itnich lapanacni ju xatalacts'ok'ulai.*

*Ju k'ai ucxtin Salomón alacxtaknilh ju ani lhamap'aksin
ju ts'alan israelitanin:*

Tasq'uini ni k'ox ack'esmatlhi ju ani lacchivinti ni vasalh
atalanini' icjumputun.

Yu'unch ju va tontojni ju talact'atak'aixt'ok'a ju
alactu'unin. Para ni cataquiclaca'i ju Dios na atalaninin
catajuna'.

Tasq'uini ni na alhilaksit'it ju Dios. Chai jantu va
min'akstu'an ju alhilaksich'ok'oc'ant'it ni na atalaninin
unt'at'it.

Ju lapanacni ju vatach tanavi talakmask'atin ixnavica ju
ixk'achat ju Dios, pus ix'akstu ju Dios ju alac'aklhtaijui ixnavica.

Jantu alhit'ahk'amant'it acsni tamamak'ahk'ajniyan ju
Dios. Pus chunch ju tanaviyan ni na va tamapainiyanch.

Tasq'uini ni at'alamac'a'unt'it ju chakolun ju va
lacati tat'ajun. Pus va yuchach ju laich at'at'amat'it ju
min'amachakach'an. Chai jantu k'ox ni va at'at'amat'it
ju ix'amachaka' ju apumatam lapanac.

Esta ilustración
no está
disponible.

Ap'uxc'a'ut'it ju k'ox amach'akxanti; jantu va tumin

Tasq'uini ni palai ap'uxc'a'ut'it ju k'ox amachakxanti;
palai jantu ju tumin nin yuch ju lactaxtokni ju na laklhu
ixlactapalhni.

*Ju ani yuch ju ali' ixlacchivinti'an ju na k'ox
talaclhatalanininta:*

Acsni alin tam ts'ahlh ju na ac'atsananta, lana k'ox
alacmak'ank'achai ju ixlacpai'an. Para acsni alin ju jantu
lai tamalaca'ini, ju ixlacpai'an lana k'ox talac'amak'aninin.

Ju tam lapanac ju jantu tu'u' laca'i, vatach past'ac'ach ni
si k'ox ju tuchi navich. Para ju tam lapanac ju atalanininta na
k'ox k'esmat'a ju tuchi lhamap'aksin ju xtaknican.

Ju lapanac ju jantu mamak'alhk'ajni ju ists'ahlh va jantu
mapaini. Pus ju vasalh mapaini ju ists'ahlh masuni tayu laich
k'ox capu'ucxuntsculh.

Ju va tonto lapanac si laca'i ju tuchi juncan. Para ju na
ac'atsananta lapanac acsnich ju laca'i ni mavasalanicanch ju
tu'u' chivinti.

Ju na ac'atsananta lapanac na lai pacxan ju tu'u'. Para ju
lana va lhitalhk'aman acsni tu'u' ju jantu k'ox lhiulai lana
lhitalacasui ni va jantu tu'u' mispai.

Acsni xamati' ju va lacatalhk'amtí xek'elayan, lai sek ayau
acsni va laca'amapaininti ju ak'elht'ai. Para ni va lacatalhk'amtí
ju ak'elht'ai pus lai va palai p'as ju cat'alak'ajin.

Palai k'ox ni va quilhpatini' acva para ajquiclaclaca'i ju Dios.
Palai jantu k'ox ni mak'alí' acva chai ni na lhu lhamak'an
acpacxalh. Palai k'ox ni actsuculh ju lacachaka' junta si
lamapainik'ocean mas va lacats'unin ca'alilh ju vaiti. Palai

jantu k'ox ni actsuculh junta na lhu alin ju vaiti chai ni va si laxcaik'ocan.

Ju laptopac ju va lak'ayachokocan ix'akstu na lhu alin ju ixlhamak'an.

Palai tachapun ju tam laptopac ju lai tastucni ju ixtalhk'amti. Palai jantu tachapun ju tam taropa ju lana va calact'alalhajak'o ju xalapanacni lakatam lak'achak'an.

Ju va palai tonto, tachi ju na va ac'atsanantach tasui acsni jantu na va lhu chivinin.

Ju pinquin chai ju alich lhek'ot'at ju lhiyalhch ju pinquin va malasani ju laptopac. Ju laptopacni ju na va lai talact'ak'ap'ai jantu tavanan lai catita'ac'atsanalh.

Jantu xamati' catilhimapalhniu amacxciai ju amacxciai quintanavinitan. Tasq'uini ni capacxau ni Dios ju calak'oxi ixlacata ju chunch lhamak'an.

Jantu k'ox ni casacstu ix'alact'atolaca ju ucxtinin ju lacatu'u' c'atan. Palai k'ox ni capacxau ni caxtaknicau ju tants'i ju capulak'amispacau. Palai na lhimaxan catapasau ni casq'uinicau ju tants'i ju puvilau, chai caxtaknichokocalh apumatam laptopac.

Jantu na va lhu a'ut'i ju t'axcat. Lai alhit'ak'enk'at'i.

Jantu va tsa alakxc'avat'ai ju minlact'atolhnin. Va lai jeks alacmavat'i.

Ju min'alact'alaxcai axt'aknin ju xcan chai ju vaiti acsni tamaktasq'uini. Pus ju acsni ju yu'unch na catalacmaxanana' chai ju Dios camapalhniyan ixlacata ni chunch ju navi.

Palai k'ox ni actavi ju lacalacat'icst'i chaka' chai lhek'acha actsuculh. Palai jantu k'ox ni act'atavi ju quin'amachaka' ju na va lai p'as lucunun ju laca'akatam k'ai chaka'.

Ni amac'ats'anic'a ju k'oxi chivinti ixlacata ju tu'u' na camatank'oxaxk'ayan. Chunch canavin tachi ju ts'uc'unc'u xcan acsni na quicxixcanta.

Ju lak'aiti chunch junita tachi ju jipi. Chai ju lalhichivinti chunch tachi ju saknat q'uiu. Ju jipi acsni ju mixa ni matich jun ju saknat q'uiu. Chai ju tu'u' lak'aiti acsni ju capcan ni jantuch xamati' tailhi'an ixlhichivinica macxciai ju apumatam laptopac.

Jantu alhit'ak'ayat'i ju tuchi anaviya' ju alakatam avilhchan. Pus ju uxint'i jant'u c'ats'ai tijuch ju catapasaya'.

Palai k'ox ni apumatam lapanac ju canaulh k'ox chivinti ju minlacata. Palai jantu k'ox ni va min'akstu ju alak'ayach'ok'oc'a.

Ju lapanac ju jantu quiclaca'l'i ju ixlaclhamap'aksin ju Dios, ju Dios vachu' jantu k'esmatni ju ixchivinti.

Ni camatank'anuputunau ju macxcai taxtokni ju navitau, jantu tu'u' ju lai k'oxi aquintaxajnitachan. Para ni canajuch chai camacajuch ixnavica ju alactu'unti, pus ju Dios aquintamac'acxaniyan.

**Ju ani ats'oknut yuch ju ts'okcanta ju
lacasast'i ixchivinti Dios ju tuchi
tapasata ju ts'okcanta ju
lacamak'ania ixchivinti Dios ju
laca**

Salmos chai ju lacaProverbios

1. Ju ali' lacmilhpat ju ixtapulak'ayai ju Dios ju israelitanin
 - Salmos 2 Ixtamalakachan ju Jesús 4:25-26; 13:33
 Israelitanin 1:5; 5:5
 Amavasalacalh 2:26-27
 - Salmos 8 Mateo 21:16
 1 Corinto 15:27
 Efeso 1:22
 Israelitanin 2:6-8
 - Salmos 22 Mateo 27:35; 27:46
 Marcos 15:24; 15:34
 Lucas 23:34
 Xivan 19:24
 Israelitanin 2:12
 - Salmos 34 1 Pitalu' 3:10-12
 - Salmo 51 Roma 3:4
 - Salmo 91 Mateo 4:6
 Lucas 4:10-11
 - Salmo 95 Israelitanin 3:7-11; 3:15; 4:3; 4:5; 4:7
 - Salmo 110 Mateo 22:44
 Marcos 12:36
 Lucas 20:42-43
 Ixtamalakachan ju Jesús 2:34-35
 1 Corinto 15:25
 Israelitanin 1:13; 5:6; 7:17; 10:12-13

Salmo 118 Mateo 21:42; 23:39
Marcos 11:9; 12:10-11
Lucas 13:35; 19:38; 20:17
Xivan 12:13
Ixtamalakachan ju Jesús 4:11
1 Pitalu' 2:7

2. Ju ali' ix'atalaninichivinti'an ju israelitanin

Lucas 14:8-10
Roma 12:20
Israelitanin 12:5-6
Amavasalacalh 3:19

